



**PARNINGOTAN NI HAMAMATE NI JESUS  
GKPI RESORT SAIT NIHUTA  
JUMAT, 2 APRIL 2021, PUKUL: 14.00**

---

1. **Marende BE. 76:1,3, “Sada nama Sangkap ni rohangku’ [BL. 199]**
2. **Votum** (U: Uluan; R: Ruas)  
U : Marhitehite goar ni Debata Ama, dohot goar ni Anakna Tuhan Jesus Kristus, dohot goar ni Tondi Porbadia.  
R : Amen
3. **Marende Be. 83:1, “Na lao do birubiru I” [BL. 214]**
4. **Martangiang**
5. **Manjaha: JESAYA 53:1-7**  
U : Tung ise ma nuaeng porsea di jamitanami? Jala tangan ni Jahowa, tung ise ma naung tumandasa?  
R : Ai simbur do ibana tubu songon tumbur di adopan ni bohina, jala songon tunas sian tano na mahiang. Ndang adong hinauli ni rupana manang hamuliaonna; ia huida hami ibana, ndang adong rupana umbahen sihalomohononhon ibana.  
U : Dileai jala dipasiding jolma do ibana, baa na somal mangae pardangolan dohot sahit ibana, pola ditabunihon halak bohina maradophon ibana, dibahen leana, jadi ndang pola hurajumi hami ibana.  
R : Tongon do angka sahitta diusung ibana, jala angka pardangolanta diporsan; alai anggo rohanta mandok: Debata do maminsang, mamungkul dohot pasipal ibana.  
U : Hape ala ni pangalaosinta ibana tartullang, binahen ni hajahatonta ibana mabugang. Ampe tu ibana

pinsangpinsang parhitean ni hasonanganta, jala binahen ni bugangna malum itahilala.

R : Luhut do hita lilu songon birubiru, ganup masitondong dalanna be, alai hajahaton ni hita sudena dihonahon Jahowa tu ibana.

U : Dipasipal pe ibana, sai manaonnaon do anggo ibana, ndang manang mangkuling pamanganna, songon birubiru do ibana na tinogu tu pamotongan, jala songon anak ni birubiru na hohom maradophon jolma sigusting ibana, tung na so dibungka do pamanganna.

## **6. Marende BE. 152:1, “Jesus na mamorsan” [BL. 120]**

### **7. Panjahaon 1**

U : Dung I dipasahat nasida ma Jesus tu nasida asa diparsilangkong. Jadi laos Jesus sandiri do mamorsan hau pinorsilang i. Jadi laho manogihon Ibana, disuru nasida ma sahalak, si Simon sian Kirene goarna ro sian ladangna; tu ibana ma dipaporsanhon hau pinarsilang I, paihutihut Jesus. Mangihuthon Ibana torop halak nang angka boruboru na mananangisi jala mangandungi Ibana. Jadi didompakhon Jesus ma nasida, ninna ma: Hamu angka boru Jerusalem, unang ma Ahu tatangisi hamu, dirimuna dohot anakkonmuna ma! Ai na ro ma angka ari sogot, dohononna ma disi:

Martua ma angka na hol, angka ina na so dung tubutubuan jala na no dung panarusan!

Disi ma pungaon ni halak mandok tu angka dolok: Tinggangi ma hami! Dohot tu angka tor: Huphupi hami! Ai molo songon I pambahennasida tu hau na rata, aha ma tagamon masa tu hau naung masak?

## **8. Marende BE. 76:4, “Sada na ma sangkap ni rohangku” [BL. 199]**

## 9. Panjahon 2

U : Alai ditogihon dope dua halak nari, parjahat, sipamateon rap dohot Ibana. Asa dung sahat nasida tu dolokdolok na margoar Golgotha, lapatanna partangkurahan, diparsilangkon ma Ibana disi rap dohot angka parjahat I, na sada di siamunna, na sada nari tu hambirangna. Jadi didok Jesus ma: Ale Amang! Marpamuati ma roham mida nasida, ai ndang diboto nasida na binahennasida i.

Alai disurat si Latus ma sada boaboa, dipalohot ma I tu hau i. On do hatana: Jesus halak Nasaret, raja ni Jahudi! Jadi torop ma Jahudi na manjaha boaboa I, ai jonok tu huta I do pamajalan ni Jesus, jala tarsurat do I di hata Heber, di hata Rom dohot di hata Gorik. Dung I didok sintua ni angka Jahudi ma tu si Latus: Unang surat i: Raja ni Jahudi; alai na nidokna I ma nian: Ahu do raja ni Jahudi! Dung I dialusi si Latus ma: Na husurat I, naung sinurat do i!

Asa dung diparsilangkon angka soldadu Ibana, dibuat nasida ma angka abitna, diparopat ma I, di ganup soldadu sabagian be, dungkon ni sampesampena. Anggo sampesampe I ndang marpanjaruman, na ditonun sambaing do i. Gabe masipandhan ma nasida: Unang ma taribahi on, martondung ma hita taringot tusi, manang di ise i. Jadi jumping ma surat I na mandok: Dibagi nasida do abithu, tondung do dibahen taringot tu sampesampengku.

## 10. Marende BE. 78:1,2, "O ulu na sap mudra" [BL. 158]

## 11. Panjahaon 3

U : alai dilealeai angka na mamolus I Ibana, angka dipaelengleleng uluna mandok: E ho, na mangalohai joro

I jala panjongjongkonsa di bagasan tolu ari! Palua dirim, molo na tutu Ho anak ni Debata: mijur ma Ho sian hau pinorsilang i! Suman tusi do pangaleai ni angka sintua ni malim, siboto surat dohot sintua ni bangso I, ai didok be: lan a asing dipalua, dirina so tarpaluasa. Raja ni Israel do Ibana. Antong mijur ma Ibana sian hau pinorsilang I, asa porsea hami di Ibana! Naung dihaposi Debata, antong, I ma paluahon Ibana nuaeng, molo na lomo rohana, ai ninna do: anak di Debata do Ahu! Laos songon I pangaleai ni panamun I, na rap diparsilangkon dohot Ibana. Ai ndada Kristus I Ho? Palua ma dirim nang hami antong! Alai dialusi donganna ibana dipinsang ma, ninna ma: Ndang dihabiari ho hape Debata, atik pe rap hona uhum hita? Uhum na tigor do na tu hita, ai tajalo do upa ni pambahenanta; alai anggo Ibana, ndang adong diula na so ture. Laos ninna ma: O Jesus, ingot ahu, ia dung sahat Ho tu harajaonMi! Gabe ninna Jesus ma mandok ibaba: Situtu do na hudok on tu ho: Sadari on do ho rap dohot Ahu di paradaiso!

## **12. Marende 79:1,8, “Di na ponjot rohangku” [BL. 79]**

### **13. Panjahaon 4**

U : Dung I jongjong ma di lambung ni Jesus na di hau pinarsilang I inana dohot paribanna dohot si Maria ni si Kleopas dohot si Maria Magdalena. Anggo Jesus dung diida, disi inana I dohot sisean haholongan ni rohana di lambungna, didok ma tu inana i: Ndi ma, inang, anakmi! Dung I didok ma tu sisean i: Ndi ma, inangmi! Jadi olat ni I ma dijangkon sisean I ibana tu jabuna.

## **14. Marende 78:3-4, “O ulu na sap mudra” [BL. 158]**

## 15. Panjahaon 5

U : Alai olat ni hos ni ari ro di pukul tolu holom ma sandok tano on. Alai tar di pungkul tolu dipangiar Jesus ma soarana, dianggukkon ma: Eli, Eli, lama sabachtani. Ale Debatangku, Debatangku, boasa tung tadingkononmu Ahu? Alai umbege I, ninna na deba sian angka na jongjong disi: Na manjou si Elias do i. Jadi dung diboto Jesus, naung marujung saluhutna, asa jumping na tarsurat I, ninna ma: Mauas Ahu! Jadi adong ma disi isian ni tuak na asom I, jadi dibutongi nasida ma limut tu bagasan tuak na asom I, dipalohot ma I tusada tolong laho manurdukhon tu pamanganna.

Jadi dung dijalo Jesus na asom I, ninna ma: Nunga marujung! Dung I mangulahi marsoara na gogo ma Jesus, ninna ma: Amang! Tu bagasan tanganMu ma hupasahat tondingKu! Jadi dung didok I, dipaunduk ma uluna, tos ma hosanna. <sup>(Ruas Jongjong)</sup>

Tapahohom ma rohanta jala martangiang be ma di bagasan rohanta be.

**(Mangkuling giringgiring 7 hali marholangholang)**

## 16. Marende BE. 449:1-2, "Sai solhot tu silangMi" [BL. 300]

## 17. Panjahaon 5

U : Jadi ida ma, laos di na satongkin I maribak ma hirehire ni bagas joro I sian ginjang ro di toru. Dung I humuntal ma tano I, marigat ma dohot angka batu mamak. Mungkap ma dohot angka tanoman, dung I hehe ma daging ni torop na badia angka na modom disi, gabe ruar ma nasida sian angka tanoman i. Ro do nasida tu huta na badia I pataridahon nasida tu torop halak. Alai dung diida induk ni soldadu I rap dohot angka donganna na jumaga Jesus I, lalo I ro di angka na masa I, mabiar situtu ma

nasida, ninna ma: Tutu do On Anak ni Debata! Jadi sude na torop I, na marluhut mainondur, masitompuk andorana, marnida na masa I laos mulak ma

## **18. Marende Be. 81:6, “Jesus mual ni ngolungku” [BL. 185]**

### **19. Panjahaon 6**

U : Alai adong ma disi torop boruboru, na manatapnatap mandaodao, I ma angka naung mangihuthon Jesus sian Galiela, paturehon Ibana. Jadi ala tongon ari parhobasan ni pesta nab alga, naeng ma unang di hau pinarsilang angka bangke di ari Sabat I; ala ni dipangido angka Jahudi ma tu si Latus, asa disuru ma mangarosak haehae nasida jala dipaijur. Gabe ro ma angka soldadu I, dirosak ma haehae ni na parjolo I songon I do donganna na rap tarsilang dohot Jesus.

Alai dung sahat nasida tu Jesus, diida ma naung sanga mate Ibana gabe ndang dirosak be haehaena. Alai ditullangkon sada sian angka soldadu I ma mundimundi tu andora ni Jesus; jadi manigor puas ma sian I mudra mardongan aek.

Na marnidasa I do na manghatindanghon I, jala sintong do na hinatindanghon na i. Ibana do umboto sintong ni na niidana I asa anggiat dohot hamu porsea. Ai na masa do I, asa jumping na tarsurat I mandok: Nandang jadi ponggolon holiholiNa!

## **20. Marende BE. 85:1,3, “Sai ingoton ni rohangku” [BL. 227]**

### **21. Panjahaon 7**

U : Jadi dung botari, di ari parhobasan I, I ma patujolo ni ari Sabat, ro ma si Josep sian Arimatia, na masuk rapot godang, halak na sangap na maimaima di harajaon ni

Debata; dipatomos ma rohana laho bongot tu jolo ni si Latus mangido bangke ni Jesus. Jadi longang ma roha ni si Latus, ala naung mate. Gabe dijou ma Letnan I, disungkun ma ibana manang naung lelung mate. Asa dung ditangkasi I sian letnan I dipasahat ma bangke I tu si Josep. Jadi dituhor si Josep ma dagangan, dipaijur ma Ibana.

Alai ro ma si Nikodemus, I ma naung ro manopot Jesus borngin-borngin najolo, diboan ma mir na marsaor aloe, arga saratus hati. Dung I dibuat nasida ma bangke ni Jesus, dibaluti ma tu dagangan rap dohot na hushus I mangihuthon adat pananomom ni Jahudi., Asa tusi ma nama dipeakkon nasida Jesus, siala ari parhobasan ni Jahudi, ai jonok do tanoman i. Dung I digulang ma batu bolon tu baba ni tanoman I, dung I laho ma nasida. Alai mangihot do angka parompuan, naung mandongani Ibana sian luat Galilea; dibereng nasida do tanoman I ro di parpeak ni bangke i. Dung I mulak ma nasida paturehon angka na hushus ro I miak mir jadi manipar ari Sabat I so nasida mangihuthon patik i.

## **22. Marende BE. 334:3, “Nasa jolma ingkon mate” [BL. 186]**

### **23. Panjahaon 8**

U : Alai torang ni arina I, na mangihut tu ari parhobasan I, marluhut ma angka sintua ni malim ro di Parise tu jolo ni si Latus, angka ninna ma: Huingot hami, Tuannami, naung didok pangansi I, di na mangolu do pe Ibana; Na hehe ma Ahu di ari patoluhon! Antong dokkon ma manjaga tanoman I sahat ro di ari patoluhon, asa unagn ro angka siseanna manangkong Ibana, jadi dohonon nasida ma tu na torop naung hehe Ibana sian na mate; gabe rumoa maon sipaotooto parpudi sian na parjolo i.

Jadi didok si Latus ma tu nasida: Togihon hamu ma parjaga i! Laho ma hamu mangaramotisa sian nasa rohamuna! Dung I laho ma nasida mangaramoti tanoman I, dipajagahon, huhut ma disahapi batu i.

**24. Marende BE. 86:4, "Silang na badia I" [BL. 67]**

**25. Ale Amanami**

**26. Pasupasu**

**27. Amen-Amen-Amen**